



Terenga 4: Hōtaka 33 – Te toai pū

He Mihi

Tēnā rā koutou e tohe puruhi nei ki te whai i tēnei ara ki Whakapiki Reo. Ko tātou hei hoa haere mō tātou anō. Ko ngā taonga mō roto i ā tātou pūtē, ko te ngākau whakapuke me te hiringa. Nau mai me ō taonga, kia patui tahi ai tātou i te ara takahanga o te reo Māori.

Hei Mahi Whakarongo

I tēnei rā, e whaiwhaihia ana e Wharehuia te kōrero mō Wairaka me te tāne, me Maiurenui. Hei te wāhanga tuarua, ka tirohia e tātou tētehi ture o te reo Māori e tika ai te rere o ā tātou kōrero. Hei whakakapi i te hōtaka, ka tukuna tētehi horopaki ki ngā taurira me kore noa e puta māori mai te reo e arotahihia ana i tēnei rā.

Kia hoki rā tātou ki te whiore o te kōrero i tīmatahia ai e Wharehuia i mua rā, e pā ana ki a Wairaka me tāna tohu i tētehi tāne māna. Anei ngā pātai hei whakautu mā koutou:

- 1) He aha te rautaki a Wairaka e mōhio ai tana pāpā ki tana whiringa?
- 2) Nōnahea te kanohi i rāpia ai?
- 3) Nō whea te tāne, i rāpia?

He Whakamārama

Ko te ture o te reo e tirohia ana i te rangi nei, ko te toai pūmua. Anei ētehi taurira:

- I kite ia i te tamāhine a Pere, i a Rereahu.
- Nā te Minita mō ngā take Māori, nā Pita Sharples te whare i whakatuwhera.
- Ko taku hoa, ko Hūria, tētehi o ngā kaiako i te kura o reira.

Ka toaitia te pūmua hei whakaatu atu, he whakakapinga te kōrero e whai ana, he whakawhānuitanga rānei. Mena kotahi te tangata, engari e rua, neke atu rānei, ngā kōrero mōna i roto i te rerenga kotahi, ka toaitia te pū hei whakataki i ia kōrero hou mōna.

Hei Mahi

Whakakāia ngā āputa i roto i ngā rerenga e whai ake nei:

1. Tukuna te reta ____ te Āpiha o te tari, ____ a Pētera Te Moana.
2. I hoko au i tētahi whare hou _____ taku whaea, _____ Pani.
3. Kāore anō taku hoa kia tūtaki _____ tana rangatira hou, _____ a Tākuta Ngata.
4. _____ rātou, _____ ngā tamariki o te kura te whiwhi.
5. He toka kei waho atu _____ te moutere nui, _____ Matakana.

Whakautu:

1. ki
2. mō
3. ki
4. Nō
5. o